

*MASTER
NEGATIVE
NO. 91-80274-32*

MICROFILMED 1991

COLUMBIA UNIVERSITY LIBRARIES/NEW YORK

as part of the
“Foundations of Western Civilization Preservation Project”

Funded by the
NATIONAL ENDOWMENT FOR THE HUMANITIES

Reproductions may not be made without permission from
Columbia University Library

COPYRIGHT STATEMENT

The copyright law of the United States -- Title 17, United States Code -- concerns the making of photocopies or other reproductions of copyrighted material...

Columbia University Library reserves the right to refuse to accept a copy order if, in its judgement, fulfillment of the order would involve violation of the copyright law.

AUTHOR:

MEINECKE, MAX

TITLE:

DE FONTIBUS, QUOS
CICERO IN LIBELLO DE...

PLACE:

[MARIENWERDER]

DATE:

[1887]

Master Negative #

91-80274-32

COLUMBIA UNIVERSITY LIBRARIES
PRESERVATION DEPARTMENT

BIBLIOGRAPHIC MICROFORM TARGET

Original Material as Filmed - Existing Bibliographic Record

8760

DZ6

Meinecke, Max.

De fontibus, quos Cicero in libello De fato
secutus esse videatur, scripsit M. Meinecke.

[Marienwerder, Kanter, 1887]

14 p. 28 $\frac{1}{2}$ cm.

On cover: Jahresbericht des Königlicher zu
Marienwerder für das schuljahr 1886/87.

VOLUME OF PAMPHLETS

74471

Restrictions on Use:

TECHNICAL MICROFORM DATA

FILM SIZE: 35mm

REDUCTION RATIO: 14x

IMAGE PLACEMENT: IA IIA IB IIB

DATE FILMED: 10.2.91

INITIALS V.W.D.

FILMED BY: RESEARCH PUBLICATIONS, INC WOODBRIDGE, CT









IMAGE EVALUATION TEST TARGET (MT-3)



PHOTOGRAPHIC SCIENCES CORPORATION
770 BASKET ROAD
P.O. BOX 338
WEBSTER, NEW YORK 14580
(716) 265-1600



87C0
DZ6

No. 5

Jahresbericht

des

Königlichen Gymnasiums zu Marienwerder

für das Schuljahr 1886/87.

Inhalt:

1. Eine wissenschaftliche Abhandlung des Gymnasiallehrers Meinecke.
2. Schulnachrichten von dem Director.

Marienwerder 1887.

Druck der R. Kanter'schen Hofbuchdruckerei.

1887. Progr. Nr. 36.

De fontibus, quos Cicero in libello de fato
secutus esse videatur.

Scipsit

M. Meinecke.

Cicero cum a republica forensibusque negotiis prohibitus otioque languere coactus philosophiam civibus explicare et rem tam gravem latinis etiam litteris comprehendere sibi proposuisset, studium omne curamque ad elaborandos de philosophia eiusque partibus libros convertit, ita ut plures brevi tempore eversa quam multis annis stante republica scripsisse se ipse confiteretur¹⁾. Atque hos tot tamque amplos de philosophia libros intra temporis spatium biennio brevius elaborans auctores praecipue graecos secutus est, ita tamen, ut non semper eandem in fontibus exhaustiendis rationem adhiberet; sine dubio iis libris, quibus praecepta certae sectae institutaque oratione perpetua explicaturus erat, ad exemplum aliorum, quae dicenda putabat, accuratius expressit quam quibus suo ipsius Marte philosophabatur: velut in libris de officiis permulta e suae scientiae cognitionisque copia exprompsisse atque e fontibus aliorum tantum iudicio arbitrioque suo, quantum quoque modo videretur, hausisse eum nemo facile neget, aliis vero scriptis ex aliorum auctoritate plane pependisse et in iis acquievisse videatur, quae de graecorum philosophorum sententiis vel a magistris acceperat vel alicubi invenerat, ita tamen, ut in recensendis illorum placitis maxima, qua potuit, cum diligentia ac fide versaretur et suum quoque iudicium adiungeret. Cuiusmodi autem in auctoribus vel graecis vel romanis adhibendis Ciceronis ratio fuerit, quantum ab aliis sumpserit, quatenus suus sit, quaestionibus de singulorum librorum fontibus subtiliter habitis inter homines doctos hodie iam constat: de fato Ciceronis libellum nemo adhuc, quantum scio, ad fontes reduxit.

Atque procedens ad hanc quaestionem mihi propositam de fontibus Ciceronis de fato libelli a principio moneo hanc rem propter mutilitatem scripti Tulliani obscuram difficilemque videri, de qua certum quid non facile quisquam dicere velle audeat, tamen, quae iam exstant, accuratius perscrutans ex iis aliquid verum vel certe veri simile confido posse expediri.

Priusquam autem ad rem adgredior, de fato philosophorum doctrinam paucis percurrere nonnulla praemittere liceat. Duae enim fuerunt veterum philosophorum sententiae, altera eorum, qui omnia censuerunt ita fato fieri, ut id fatum necessitatis vim adferret, in qua sententia Democritus, Heraclitus, Empedocles, Aristoteles, Stoici fuerunt, altera eorum, quibus visi sunt sine ullo fato esse animorum motus voluntarii. Epicurus postea ope declinationis atomorum libertatem voluntatis a naturalibus impulsionibus necessariisque causis liberari. Chrysippus autem Stoicus cum medium inter Stoicos et Epicureos ferire vellet, in fato vim necessitatis non posuit, cum propensionem et inclinationem in hominum potestate relinqueret²⁾. Contra quem disputavit Diodorus dialecticus, qui quidem fatum non inducebat, sed in libro περί δυνατῶν quaerebat, quae vis esset earum enuntiationum, in

¹⁾ Cic. de offic. III, 1, 4.

²⁾ Cic. de fato 17, 39.

quibus aliquid fieri posse aut non posse dicebatur, cum ex vi verborum et ex enuntiationibus Chrysippus fatum confirmaret. Deinde Carneades Academicus acutissime et subtilissime Stoicis respondens gravibus argumentis contra horum de fato sententiam docuit motum esse posse quendam voluntarium a se ortum, cuius antegressae externaque essent causae nullae. Scilicet rursus Stoici Academicorum argumenta refutare studuerunt nec tamen omnibus partibus antiquiorum sententias tuiti esse, sed aliquid videntur mutavisse. Quid Panaetius, Stoicorum princeps, qui priorum acerbiter sententiarum spinasque disserendi improbat, de fato senserit, nusquam traditur; tamen cum de vi divinandi eum plane dubitasse appareat e Diog. Laert. 7,149¹⁾, hac quoque in re eum ab antiquioribus degenerasse conici licet; nam qui divinationem improbat, is fatum non potest defendere. Posidonius autem quanquam multis partibus magistri vestigia sequebatur et rationem Stoeae emendandae ab illo praescriptam inchoatamque tenebat, tamen fatum rursus defendisse videtur, certe in hoc genere respectis illorum argumentis captiosas et fallaces a Chrysippo adhibitas conclusionis vitavisse credi potest ex iis verbis, quibus Cicero in libro de fato a Posidonio ad Chrysippi laqueos revertitur (4, 7). Sed satis de hoc.

Jam ad rem adgrediamur. Libello, qui de fato inscribitur, Cicero sermonem exposuit a se habitum cum A. Hirtio consule designato a. u. c. 710 post Caesaris interitum in Puteolano, unde tum etiam epistulas ad Atticum (14,9 et 10) misit. Hic autem libellus ad nos non pervenit integer, sed deest exordium, tum disputationis contra Posidonium susceptae principium, deinde argumentationis contra Chrysippum institutae extrema pars et totius scripti exitus. Uno an duobus libris²⁾ a Cicerone conscriptus fuerit, nemo videlicet hodie dicat. Nec multum hoc refert. Quae autem superest pars disputationis, ea versatur in refutandis quibusdam captiosis Stoicorum argumentis, quibus fatum esse probabant. Neque vero in eam partem accipienda eius argumentatio est, quasi fatum non esse adfirmeret, sed ex iis, quae Stoici attulerint, hoc non probari. Quod autem in libris de deorum natura et de divinatione compositis Cicero fecerat, ut in utramque partem perpetuam explicaret orationem, quo facilius id a quoque probaretur, quod cuique maxime probabile videretur, id in hac de fato disputatione non fecit, sed ipse solus contra Stoicorum sententiam disputans non omnia fato geri et evenire defendit. Ac primum quidem refutatur argumentum Stoicorum e contagione naturae, quam *συμπάθεια* vocabant, ad confirmandum fatum petum; cuius quidem disputationis partis principium mala fortuna intercidit. Tamen quae §§ 5 et 6 comprehenduntur et verba, quae initio § 7 exstant, ostendunt in amissa orationis parte contra Posidonii potissimum argumenta Ciceronem disputasse. Primis iam verbis, ubi Cicero in Antipatro poeta, in brumali die natis, in fratribus simul aegrotantibus, in urina, in unguibus, in reliquis eiusmodi vim esse fatalem ullam negat, exempla breviter repetit, quae antea nimirum accuratius explicavit. Bona fortuna restant iam nobis Augustini in libro de civit. dei 5, 2 verba³⁾: „Cicero dicit Hippocratem nobilissimum medicum scriptum reliquisse quosdam fratres, cum simul aegrotare coepissent et eorum morbus eodem tempore ingravesceret, eodem levaretur, genuinis suspicatum; quos Posidonius Stoicus multum astrologiae deditus eadem constitutione astrorum natos eademque conceptos solebat adserere; ita quod medicus pertinere credebatur ad simillimam temperiem valetudinis, hoc philosophus astrologus ad vim constitutionemque siderum, quae fuerat quo

1) cf. Cic. de div. I, 3, 6; II, 15, 35; Acad. pr. II, 33, 107.

2) Verbis Gellii n. att. 6, e. 2 (p. 367) „Cicero in libro, quem de fato conscripsit, veri simile fit uno libro de fato disputationem comprehensam fuisse; tamen Kühnerus in libro (de M. T. Ciceronis in philosophiam eiusque partes merita. Hamburg. 1825) p. 59 scribit: „Libris de nat. deor. et de divinatione adiunxit duos de fato libros, ut toti huic quaestioni abunde satisfactum esset; e quibus exordium et alterius libri particula exigua nobis est servata.“ Unde hoc coniciat v. d., non intellego.

3) Cic. opera edd. Baier et Kayser ex offic. Tauchnitz. vol. VII, p. 233.

tempore concepti natiqque sunt.“ Verba, quae plena attuli, sunt Ciceronis ipsius, et quanquam ab Augustino hoc loco non illius de fato libello attribuuntur, tamen aliunde non possunt sumpta esse nisi e prima Ciceronis contra Stoicos disputatione, quae inter §§ 4 et 5 inserenda haud ad nostram aetatem tota pervenit. Ac sicuti de fratribus simul aegrotantibus copiosius verba facta sunt, ita non minus de reliquis eiusmodi exemplis, quae Cicero § 5 init. repetit, accuratius eum disseruisse conici potest. Neque tamen hunc in modum solum lacuna explenda est, nam legimus in disputationis posteriore parte (17, 40) haec Ciceronis verba: „atque hoc, si placet, quale sit videamus in adsensionibus, quas prima oratione tractavi.“ Hoc igitur loco Cicero dicit se prima disputationis parte adsensiones iam tractavisse, proxima autem perscrutari velle, num fato adsensionibus adhibito necessitas ab his removeri possit. Nunc autem in ea, quae superest, Ciceronis commentatione de adsensionibus nullum exstat verbum; sequitur. ut de his eo loco actum sit, qui hodie non iam superest, i. e. hoc ipso disputationis principio.

Sed iam quaeramus, quemnam auctorem in iis, quae § 5 hodie leguntur, Cicero secutus videatur. Atque hoc loco Ciceronis ipsa verba auctorem luculente significant, ita ut nisi qui Tulliani moris ignarus est, de fonte non possit dubitare. Haec exempla a Cicerone deprompta sunt e Posidonii libro, qui scribenti ante oculos praesto fuisse debet. Posidonii enim, qui verbis expressis magister appellatur, venia impetratur, si e magno illo exemplorum numero absurda nonnulla dicuntur. Verba Ciceronis sunt: „quaedam etiam Posidonius — pace magistri dixerim — comminisci videtur; sunt quidem absurda.“ Cicero igitur se excusat, quia Posidonium magistrum quaedam dixerit commentum esse, quod quidem non incogitate dixerit, cum re vera in iis, quae profert Posidonius, quaedam exempla plane sint absurda. Quaeritur, haec exempla e Posidonii scripto, quod Cicero componens in manibus tenebat, sintne sumpta an ab ipso e memoria addita. Nihil accipi potest nisi Posidonii scriptum praesto ei fuisse; namque cum adgreditur ad redarguenda exempla a Posidonio prolata, Posidonium ante oculos scribenti sibi esse ut fateamur ipse cogit; quibus in exemplis naturae contagio valeat, in iis dicit nullam esse vim fatalem; in aliis autem fortuita quaedam esse posse, quaedam etiam absurda esse; „quid autem magnum, naufragum illum sine nomine in rivo esse lapsum? quanquam huic quidem hic (sc. Posidonius) scribit praedictum in aqua esse pereundum.“ Item verba, quae sequuntur: „ne hercule Icadii quidem praedonis video fatum ullum; nihil enim scribit (sc. Posidonius) ei praedictum“, Posidonii scriptum Ciceroni praesto fuisse demonstrant. Atque in Ciceronis explicationis ea parte, quae inter § 4 et § 5 inserenda hodie non iam exstat, Posidonii mentionem factam esse, ex iis, quae ex Augustini libro supra commemoravi, verbis satis elucet.

Posidonius autem, Ciceronis magister, doctrinae fama operumque praestantia clarissimus, ut in ceteris de philosophia scriptis omnes partes peragrans cunctas mente comprehendit¹⁾, ita in libro de fato totam materiam dicitur complexus esse. Inter multos enim librorum titulos, quos Diog. Laertius in septimo de vitis, dogmatis, apophthegmatis clarorum philosophorum libro Posidonio nostro tribuit, exstat de fato scriptum. Sunt autem verba, quibus hoc arguitur, Diog. Laert. 7,149 p. 188 Hübner: καὶ εἰμαρμένῃ δὲ καὶ τὰ πάντα γίνεσθαι ἡρότιμος ἐν τοῖς περὶ εἰμαρμένης καὶ ἡ σοσιγόνους ἐν δευτέρῳ περὶ εἰμαρμένης καὶ . . . Posidonium igitur libros de fato scripsisse pro certo affirmari potest; duos tantum an plures scripserit, nullo docetur testimonio.

Sed redeamus ad rem nobis propositam. Posidonii opus, quod Ciceroni § 5 scribenti

1) cf. J. Bake, Posidonii Rhodii reliquiae doctrinae. Lugd. Bat. 1810.

ante oculos fuisse videtur, id ipsum haud scio an fuerit, quod a Diogene Laert. commemoratur *περί εἰμαρμένης*; inscriptum. Itaque rem optime intellegimus, si ea, quae hic profert Cicero, exempla ex hoc Posidonii scripto eum sumpsisse suspicamur. Quatenus ad verba magistri in excerptis Posidonii libris Cicero se adiunxit, accurate non potest disceptari, cum praesertim eorum, quos Cicero in libris de philosophia conscriptis secutus videatur, auctorum paene nullae iam supersunt reliquiae. Tamen si Cicero verbis §§ 5 et 6 comprehensis illius exempla dicit absurda esse iisque nullam vim fatalem demonstrari, sed ad naturam aut fortunam omnia posse referri, iam id a principio statuamus oportet in excerpto auctore Ciceronem maiore libertate versari et in recensendis magistri argumentis suo saepius uti iudicio. Et sine dubio plane suus est in extremis § 6 verbis, quibus refutationem Posidonii argumentorum absolvit: „si fati omnino nullum nomen, nulla natura, nulla vis esset, et forte, temere, casu aut pleraque fierent aut omnia, non aliter ac nunc eventura omnia; quid ergo attinet inculcare fatum, cum sine fato ratio omnium rerum ad fortunam naturamve referatur.“ En Ciceronis ipsius de fato sententia. Sed pergamus.

§ 7 Posidonii argumentis refutatis Cicero verbis „ad laqueos Chrysippi revertamur“ ad Chrysippi captiosam argumentationem adgreditur, cui quidem primum de hac ipsa contagione rerum respondeat, de qua iam Posidonio antea responderat. Hic monere velim vel ex his Ciceronis, quibus ad Chrysippum transit, verbis concludi posse, in priore iam explicationis parte de Chrysippi fallacibus conclusionibus verba facta esse, nimirum prima illa oratione, quae mala fortuna perit. Nunc igitur postquam contra Posidonii argumenta disputavit, ad Chrysippum Cicero redit. Argumentum Stoicos ad fatum probandum e contagione naturae arcessivisse testatur Plutarchus in libello, qui ipse mutilus ad nos pervenit, de fato his verbis: *δευτερον δὲ τὸ πρῶτον ἀποκρίσθαι πῶς τὴν αἰσχροῦ εἰμαρμένην καὶ συμπαθεῖν αὐτὴν αὐτῷ ὄντα*¹⁾, qua quidem contagione Cicero nihil effici respondet, nisi ut alii ad alia propter causas naturales et antecedentes sint propensiores. Certum sane esse perorat ex tenui caelo homines acutiores putari, velut Athenis Zenonem, Arcesilam. Theophrastum aliosque homines ingeniosos floruisse, crasso contra caelo pingues et robustos gigni, velut Thebanis corpora ad varia certaminum genera apta esse; illa vero loci contagione non effici, ut quis Zenonem aut Theophrastum audire aut in Nemeis potius ludis quam in Isthmiciis certare aut in Pompei porticu potius quam in campo ambulare velit. Ad quasdam igitur res naturam loci pertinere aliquid, ad omnes non valere: certe non intellegi, quam vim naturae contagio in hominum adpetitiones et voluntates habere possit.

Disputat hoc modo Cicero contra Stoicorum. Chrysippi potissimum, argumentum a contagione naturae petitur. Chrysippus, homo sine dubio versutus et callidus, Stoicorum disciplina omnibus partibus excolenda decretisque defendendis clarissimus, de fato scriptum composuit teste Diog. Laert. 7, 149 *ἐν τοῖς περὶ εἰμαρμένης*, praeterquam quod etiam in libro *περὶ προνοίας*: de fato aliquid protulisse dicitur ab Aul. Gellio 7, 2, 3 his verbis: „(Chrysippus) in libro *περὶ προνοίας* quarto *εἰμαρμένην* esse dicit *φυσικὴν τὴν σύνταξιν τῶν ὄντων* ἢ *ἀπὸ τοῦ τῶν ἑτέρων τοῖς ἑτέροις ἐπακολουθούσαν*“ etc. Cicero autem in libello de fato et nostro loco et posteriore oratione saepius huius Chrysippi non solum mentionem fecit, sed etiam sententias eius ad verbum expressit. Nunc quaeritur, num in hac disputatione contra Stoicorum fatum suscepta Cicero, quae hodie apud eum legimus, ex ipso Chrysippo hauserit. Ac sunt, qui putent in componendis de philosophia libris ex eorum, quoscumque nominat, philosophorum scriptis Ciceronem cuncta conscripsisse. Cui quidem sententiae a

¹⁾ cf. Zelleri hist. philos. III p. 162. Universam hanc illorum de fato doctrinam a scriptoribus historiae philosophiae non satis explicatam enarravit O. Heine in libro: Stoicorum de fato doctrina. Numburg. 1859.

Teuffelio¹⁾, Kuehnero aliisque defensae cum brevis repugnat narrationis, tum admirabilis illa celeritas, qua intra spatium temporis tam exiguum tot tantosque de philosophia libros Cicero composuit. Nec dubium esse potest, quin philosophorum placita decretaque non ipse ex eorum scriptis Cicero collegerit, sed collecta in aliquo libello reppererit. Huc accedit, ut in adhibendis graecis auctoribus Cicero eam secutus sit rationem, ut unum potissimum ante oculos haberet et tum demum ex aliis suppleret, si quando ille non satis accurate rem et copiose videbatur exposuisse. Quae cum ita sint, auctorem indagemus oportet, in quo Cicero Stoicorum de fato sententias a Chrysippo constitutas, a posterioribus contra Academiam defensae repperisse videatur. Nunc autem inter Stoicos, qui Chrysippo succedebant, nominantur Zeno, Diogenes Antipater, Panaetius, Posidonius, e quibus cum Zeno et Diogenes Antipater in censum nobis venire non possint, Panaetius et Posidonius restant. Panaetius, quem divinationem in dubium vocasse et multis partibus ab antiquioribus degenerasse constat, in nostro de fato libello nullo loco commemoratur, contra Posidonius priores disputationis paragraphos perlustrantibus is nobis probari debuit, cuius liber Ciceroni de fato scribenti ante oculos fuit. Quodsi a Cicerone initio § 7 Posidonius dimittitur, ut ad Chrysippi laqueos reditus fiat, non ita nimirum hoc intellegendum est, ut statuamus Posidonii scriptum Ciceronem seposuisse et alium scriptorem adhibuisse. Posidonium Cicero auctorem etiam in Chrysippi sententiis enarrandis et redarguendis secutus est. Sed rem plane perspicuam fieri posse confido, si longius in commentatione nostra erimus progressi. In ea, de qua nunc agimus, parte Chrysippi argumentatio ex contagione naturae petita exemplisque probata repudiatur et ita, ut et ipse Cicero e sua aliquid scientia addat. Thebarum Athenarumve caelum quantam vim in hominum habeat naturam, Cicero quamvis ipse non ignoraverit, tamen in auctore iam invenisse videtur, sed ut orationem reddat speciosiore, saepius e romana quoque vita historiaque exempla adfert, velut hoc loco porticus Pompei, campi Martii, Jduum, Caendarum mentio fit. Sed iam pergamus.

Postquam demonstratum est naturae contagione nihil effici, nisi ut propensiores alii ad alia sint, § 10 etiam propensiones propemodum tolli posse exemplis Stilponis Megarici et Socratis²⁾ probatur.

Ad eiusmodi exempla excogitanda etsi non ita multum acuminis opus est, tamen recte rem nescio an intellegamus, si ea quoque in auctore, quem Cicero sequitur, iam exposita fuisse accipimus, cum praesertim et hoc et aliis locis arte cum argumentatione ipsa cohaereant.

Absolute primo Stoicorum de fato capite § 11 ad alterum accedit Cicero argumentum a divinatione petitur. Hac occasione tangitur luctatio illa *περὶ ὄντων*, quae Chrysippo erat cum Diodoro. Hic enim id solum fieri posse dicit, quod aut sit verum aut futurum sit et quicquid futurum sit, id fieri necesse esse et quicquid non sit futurum, id negat fieri posse; cui quidem sententiae Chrysippus refragatus etiam, quae non sint futura, fieri posse defendit. Cicero autem e divinationis comprobatione docet in Diodori sententiam Chrysippum invitum delabi (§§ 12—14).

Vestigia fontis Ciceronis circumspicientibus duobus huius disputationis partis locis Stoicae

¹⁾ Hist. litt. rom. p. 332.

²⁾ Idem Socrates, cuius e corporis statura Zopyrus physiognomon mores pernoscere quamquam profitebatur, non valebat, commemoratur a Cicerone Tusc. IV, 37, 80. Atque vitia e naturalibus causis nasci, extirpari autem et funditus tolli voluntate studioque eodem exemplo Socratis probatur ab Alexandro Aphrodisiensi Peripatetico, qui quidem in libro *περὶ εἰμαρμένης* conscripto accuratius Cicerone hanc totam questionem persecutus est (edit. Orelli. Turic. 1824 c. 6 extr.). Cf. Zeller, l. c. III p. 778, 789 sq. Num et quatenus hinc in communem utriusque auctorem sit coniciendum, non ad nostram pertinet rem.

doctrinae membra certa nobis occurrunt, e quibus non ad Academici, sed ad scriptum Stoici cuiusdam Tullianum de fato libellum reducendum esse apparet. Atque Stoicum auctorem indicant verba Ciceronis initio cap. 6 de divinatione, qua quidem Stoici fatum confirmabant. Etenim cum divinatio constet ex earum causarum observatione, quarum colligatione fatum necitur, fatum esse debet, si divinatio est. Quod quidem Stoicorum argumentum Cicero vel is, quem sequitur, auctor refutans fato ex divinationis ratione firmato voluntatem, studium, disciplinam tolli dicit nec divinationem esse, nisi, quaecumque futura praedicantur, necessario eveniant. Hic paulum subsistamus. Namque contra divinationem ipsam nihil dicitur, cum ex ea argumentum ad fatum probandum peti posse negatur. Nunc autem si in libello de fato componendo Academico auctore Cicero nixus esset, divinationem prorsus improbare debuit. Itaque cum Stoici eam comprobarent, e Stoico fonte Cicero hauserit necesse est. Longius videamus. Vel Posidonii auctoris indicium his de divinatione verbis praebetur nobis luculentissimum. Etenim hac ipsa re, quam ut philosophis probarent, Stoici argumenta undique colligebant, Panaetium quidem Academicorum praecipue argumentis respectis ab antiquioribus degenerasse et de vi divinandi plane dubitasse constat e Diog. Laert. 7,149: *ὁ μὲν γὰρ Παναίτιος ἀνυπόστατον αὐτῆν* (sc. τὴν μαντικὴν *ἐποίησεν*). Posidonius vero quae de divinatione a Carneade Academicis reiecta, in dubium vocata erant a Panaetio, eadem defendisse traditur. Inter Stoicos autem recentiori aetati tribuendos ii potissimum momenti nobis debent esse, qui post Chrysippi aetatem Academicorum argumentis iam tacti erant. Praecipue autem cogitandum est de Panaetio et Posidonio, inter quos optio eligendi fluctuare videatur. Sed cum Panaetius divinationem reiecerit, hoc autem, de quo agimus, loco divinitio accipiat, unus nobis Ciceronis auctor restat Posidonius. Accedit, quod Academicae disputandi rationis nusquam, Stoicae alia insuper vestigia exstant, velut de oraculis divinisque praedictis Ciceronis verba (§ 13); namque singula divinationis genera, auspicia et omina, oracula et vaticinia ab Academicis plane improbabantur, quod quidem maxime elucet e Ciceronis in secundo de divinatione libro contra Stoicam rationem superiore libro explanatam disputatione instituta (cf. praecipue 2,56 sq.). Itaque pro certo paene poni potest non Academicum Ciceroni praesto fuisse auctorem, sed Stoicum²⁾, et cum pro solita in exhaustiendis graecis fontibus ratione in uno eodemque Cicero, quem sequeretur, auctore persisteret, eum fuisse Posidonium. Jam licet addi Ciceronem tota hac enarratione (§§ 11—14) disseruisse, nisi quae in Posidonio de Chrysippi et Diodori argumentatione disserta invenerat. Posidonius rursus Chrysippi hanc divinorum praedictorum interpretationem adferens in scripto Chrysippeo niti potuit, qui quidem *περὶ χρησμῶν* duobus libris totam de divinatione sententiam tradidit explicasse³⁾, quanquam addendum est ipsum quoque Posidonium quinque libros *περὶ μαντικῆς*; composuisse teste Diog. Laert. 7,149⁴⁾. Hoc nostro loco Cicero Diodori sententia explicata Chrysippo satis responderi videtur putasse. Num et quatenus Posidonius Diodoro adsticiens Chrysippi de hac re opinionem probaverit, postea exponere liceat; nunc satis habeo ostendisse Stoico e fonte haec verba fluxisse.

Cicero ipse, ut erat Academicus et Academicorum disputandi genere imbutus, fatum Stoicorum sine dubio improbavit, attamen ut de fato philosophorum decreta explicaret, Stoicum auctorem sequi coactus est, scilicet cum a Stoico de hac re accuratius disputatum esse intellexisset.

¹⁾ Cf. Cic. de div. I, 3, 6; II, 15, 35; Acad. pr. II, 33, 107.

²⁾ Non recte igitur indicasse Zellerus mihi videtur, qui l. c. III¹. p. 651 adn. 1 Clitomachum Ciceronis in libello de fato conscripto auctorem fuisse opinatur.

³⁾ Cf. Cic. de div. I, 3, 6; 19, 37; II, 56, 115; 65, 134.

⁴⁾ Cf. Cic. de div. I, 3, 6; 30, 64; 55, 125; 57, 130; II, 15, 35; 21, 47.

Sed rem persequamur. Priusquam de contentione illa inter Chrysippum et Diodorum verba facere pergat, Cicero c. 8 de Chrysippi distorto enuntiandi genere, quo Chaldaeos ceterosque divinos sperat contentos Stoicorum causa fore, nonnulla profert. Docet enim Chrysippus, ne in Diodori, contra quem disputat, sententiam ac rationem incidat, quomodo eos praecepta (*θεωρήματα*) exponere oporteat, ita ut e communibus et universis connexis ea ad coniunctionum negationem transferantur, quasi plus in hac sit necessitatis.

Reditus fit § 17 ad certamen illud *περὶ δυνατόν*, in quo, quid valeat id, quod fieri possit, anquiritur. Diodoro enim videtur id, quod fieri possit, necessario evenire, Chrysippo autem placet non necesse esse evenire. Diodorus igitur in enuntiatis vim verborum interpretans neque quicquam ea nisi necessitate veri vel falsi habere censens non causarum seriem ponit sempiternam neque fati necessitatem confirmat. Quam controversiam *περὶ δυνατόν* totam ad logicen pertinentem Cicero adhibet, quia omnem enuntiationem aut veram aut falsam esse Stoici ad fatum confirmandum putabant. Illustratur autem haec Diodori cum Chrysippo contentio a Cicerone exemplo Scipionis noctu in cubiculo vi oppressi. Eiusmodi exempla e romana historia repetita quin a Cicerone ipso adiuncta sint, dubitari non potest. Ceterum ubi viri vel res nominantur, quae nisi a romano homine nominari non poterant, ibi liberius Cicero perorare incipit, praesertim si exempla eiusmodi sunt, ut homini romano ad tempus praesto fuisse debeant. Itaque vel hoc loco Cicero in argumentando et enarrando expeditius versari videtur. Tali modo magna arte sibi praecipue confusus libere, quae legit vel didicit, effingere studens non raro orationem elegantem exhibet politamque. Sed satis de hoc et nescio an nimium.

Jam restat, ut de illis, quae de Epicuri opinione fiunt, verbis aliquid proferam. Cicero postquam § 17 necessitate veri vel falsi in enuntiationibus coarguta ea de causa Stoicorum fatum comprobare non posse exposuit, § 18 ab Epicuro pergit sine causa motum quendam commenticium de via declinationis atomorum introduci. Namque Epicuro, cui voluntas declinatione inducta naturalibus impulsibus necessariisque causis liberari et ita fatum tolli videatur, quamvis concedat omne enuntiatum aut verum aut falsum esse, non verendum esse, ne omnia fato fieri necesse sit; etenim verum vel falsum esse aliquid non semper causis aeternis, sed saepe causis fortuito antegressis, in quibus nulla sit necessitas fatalis. Velut si quis in Academiam descendat, causis hunc moveri non e naturae necessitate manantibus, sed voluntariis.

Quae quidem de Epicuri doctrina verba scribens quin Cicero ex Epicuri vel Epicurei libro non hauserit, sed in eius, quem ceteroquin est secutus, scripto invenerit, ex eo, quod supra de Ciceronis in libris philosophis componendis ratione dictum est, dubitari non iam potest. Quo bene pertinet, quod tribus locis, quibus atomorum declinationis per occasionem mentio fit (9, 18; 10, 22; 20, 46) Epicuri doctrina non adfertur, nisi ut ostendatur ad Stoicorum fatum reprobandum eam non valere, sed alio modo hanc causam oportere disceptari. Haec haecenus; alia videamus.

Transit Cicero c. 10 ad tertium argumentum, quo Stoici fatum probare studebant: sine causa nihil esse⁵⁾. Atque in Chrysippi doctrina exponenda pergit ita ratiocinantis: si est motus sine causa, velut appetitio aut voluntas hominum, non omne *αἴτιωμα* Stoicorum aut verum aut falsum erit; nam quod non habebit causas efficientes, id nec verum nec falsum erit; omnis autem enuntiatio aut vera aut falsa est; motus igitur sine causa antegressa nullus est; itaque omnia fato fiunt.

Ad haec Cicero quanquam concedit motum sine causa esse nullum, tamen, quaecumque fiant, fieri omnia causis antecedentibus negat: etenim voluntatis nostrae non esse causas externas et

⁵⁾ Cf. Plutarchi (de fato II, p. 574) verba: τὸ μὲν ἀναπύω γίνεται, ἀλλὰ κατὰ προηγούμενα αἰτίαι.

antecedentes. Atque Chrysippi conclusionem refutans Epicuri et Carneadis ratiocinatione utitur. Ac primum quidem Epicurus omnem enuntiationem aut veram aut falsam esse negans tertio quodam motu extra pondus et plagam posito necessitatem fati vitari putabat declinatione atomorum, qua quidem aliquid liberum nobis restaret. Carneades autem Epicuri de atomorum declinatione opinionem reprobandus ipse quoque et multo subtilius Stoicis respondebat; docebat enim motum animi esse quendam posse voluntarium eiusque non esse antecedentes et externas causas. Quae quidem Carneadis pro Epicuro responsio Ciceroni placuisse videtur et inde proficiens § 24 sq. de cotidiano dicendi sermonis usu aliquid idque e suo ingenio addere potest. Communi enim consuetudine sermonis si „sine causa“ quis aliquid velle dicatur, non sine aliqua causa, sed sine externa et antegressa causa hoc intellegendum esse. Atque ut in atomorum motibus negat extrinsecus causas quaerendam, ita ab adpetitionibus quoque antegressas causas esse abiudicandas. Itaque opinionem Chrysippi rem esse sibi factam putantis, si doceat omne enuntiatum aut verum aut falsum esse, facile dilui posse, quoniam futura vera, quae causas, cur futura sint, habeant necesse sit, habere possint fortuitas causas et voluntarias, non aeternas immutabilesque.

Oratione huc progressa Chrysippi argumentationis tertia pars absoluta est. Quaerentibus autem, utrum Cicero in hac e suo ingenio an ex alio auctore hauserit, hoc nimirum a principio nobis abrogandum est ex Epicuri et Carneadis scriptis Ciceronem ea, quae contra Chrysippi argumenta dicenda erant, excerptisse; sed in eo potius, quem usque secutus est, Stoico auctore, quod a singulis sectis philosophis de Stoicorum doctrina et contra fatum erat disputatum, videatur invenisse. Accedit, quod §§ 20—26 praeclare verba verbis continuantur et uno loco, Chrysippus quid dixerit, ipsius verbis expressum est. Itaque statuere licet in hac disputationis parte exceptis fortasse §§ 24 et 25 Ciceronem artissimo vinculo cum auctore, quem sequitur, cohaerere. Aliter de § 27 sq. iudicandum est. Jam enim satis demonstratum videtur causis fortuitis et voluntariis effici posse, ut verum et falsum sit in enuntiatis, itaque disputationem absolutam putares, tamen proximis paragraphis de hac eademque re accuratius peroratur. Adde, quod ad Chrysippi sententiam labefactandam exempla e romana historia adsumuntur et tota argumentandi ratio fluctuat. Quid tandem? nonne hinc in coniecturando initium capiendum videtur? Sine dubio hac orationis particula § 27 comprehensa liberius Cicero peroravit. Cum autem novum aliquid ad Chrysippi argumentationem diluendam non addatur et in exemplis viri nominentur, qui nisi a romano homine haud scio an nominari non potuerint, rem optime intellegemus, si totam § 27 a Cicerone ex ipsius arbitrio elaboratam accipimus. Exempla quidem quin Cicero ipse adiunxerit, dubitari non potest. Ceterum oratio Ciceronis elegans politaque docere nos debet, quanta arte in argumentando et enarrando iis potissimum locis potuerit versari, ubi sibi praecipue confusus, quae e suae scientiae copia sibi praesto erant, libere studebat effingere.

At pergamus. Cicero postquam § 28 sine fato docuit futura immutabilia esse posse, ignavam, quam dicunt, rationem paucis tangit, quae e fato ducta iis nimirum, qui fatum esse affirmabant¹⁾, incommodo erat. Nunc autem Chrysippus captionem, quae inerat in ignava ratione, ita solvere studebat, ut in quibusdam rebus simplex, in aliis copulatum esse fatum poneret, quare Carneades in oppugnando Stoicorum fato hanc ignavam rationem non adhibuit, sed alio eos modo premere conatus est. Quae quidem ignava ratio (ἀγνή: ἰσχυρ), qua admissa homines inertes fiunt et

¹⁾ Haec conclusio, quae fati infirmandi causa Stoicis potissimum obici solebat, nimirum non a Stoicis constituta est, sed contra eos adhibita. Conf. Zeller, hist. phil. graec. III¹ p. 168 adnot.

omnis e vita tollitur libera actio, in omnibus scholis cum aliorum philosophorum tum Stoicorum tractabatur, neque ulla hac disputatio erat antiquior et communior. Cum autem inde fatum optime subverti posset, Stoicis potissimum, fati adsertoribus, haec ratio dissolvenda erat; et Chrysippus quidem quomodo ignavae rationi responderit, ex iis, quae § 30 exstant, Ciceronis verbis luculenter elucet. Quae quidem verba e graeco suo auctore sine dubio excerpta e graeco in latinum sermonem hic illic correctione quadam adhibita Ciceronem transtulisse apparet cum ex exemplis ad rem illustrandam additis tum ex iis verbis, quibus haec Chrysippi argumentatio concluditur: „haec, ut dixi, confatalia ille (sc. Chrysippus) appellat.“ „Confatalia“ autem est, quod Graeci „συγκατασφαιρέα“ dicunt (cf. Plut. mor. III, p. 205 ed. Wyttenb.).

Hanc igitur ad verbum expressam auctoris argumentationem Cicero adsumpsit, item quae de Carneadis conclusione ad fatum Stoicorum refutandum ab eodem allata invenerat. Carneades enim Diodori sententia περὶ ἀναγκῆς adversus Stoicos adhibita cum vera ex aeternitate futura esse sine colligatione naturali causarumque necessariorum antecessione defenderet, immutabilitatem in futurarum rerum veritate non probabat nisi in iis, quarum causas natura ita contineret, ut eas fieri necesse esset; ne Apollinem quidem futura posse dicere nisi ea, quae causis naturalibus et necessariis continerentur. Disputatione huc progressa Cic. § 33 sq. ad rem probandam exemplum addit Marcelli, quem quidem in mari periturum esse praedici potuisse negat. Hoc loco nostrum sui esse ex iis satis videtur elucere, quae supra de exemplorum e romana historia repetendorum ratione commemoravi. Neque minus autem libere suoque nisus iudicio in ea commentationis parte videtur perorare, quae c. 15 hodie comprehenditur. Colligit enim Cicero Diodoreis rationem esse liberiores et solutionem quam Stoicis, quibuscum discrepant; deinde postquam proxima paragrapho id, quod supra oppugnatum erat, nihil posse evenire nisi causa antecedente concessit, tamen sequi fatum esse negat, nam non quod cuique antecedit, id esse ei causam, sed quod efficienter cuique antecedit; quare fortuitas praecursiones in causis non posse numerari.

Nam et quatenus hoc loco e fonte suo graeco Cicero hauserit, pro certo dici non potest, tamen in ratione liberius perorandi hac eum paragrapho perseverasse probabile videtur esse; primum enim res, quae tractatur, inter omnes constat et scriptori philosophiae non plane imperito nota debuit esse, tum autem ex exemplis ad sententiam probandam allatis unum certe e rebus romanis sumptum, cetera homini romano sine dubio expedita erant. Quae cum ita sint, optime Ciceroni hanc totam enarrationis partem tribuimus, cum praesertim versus § 35 ex Ennii Medea commemorati in eum sine dubio reducendi sint. Verba igitur, quae extremis paragraphis (§§ 33—35) comprehenduntur, omnia fere Ciceroni adsignanda videntur esse, eo saltem, ut haec scribens liberius disputasse et quae dicenda putaret, ex ipsius arbitrio elaborasse credatur.

Sed rem persequamur. Cicero § 36 non id, sine quo effici quicquam non possit, causam docet esse, sed id, quod cum accesserit, id, cuius sit causa, efficiat necessario. Necessitatem vero esse in disiunctionum contradictione, itaque partem alteram veram, alteram falsam esse. Quod cum defendatur a Chrysippo, tenendum esse, ita ut quaedam ex aeternitate vera et fati necessitate esse libera dicantur.

Atque quaestionem de enuntiationibus aut veris aut falsis habitam Cicero exemplo illustrat Philoctetae serpentis morsu sauciati et in insula Lemno relict, quo quidem perspicue auctor graecus videatur indicari, qui Epicureorum opinionem improbandus Chrysippeam sententiam quam plurimum sustinere conabatur. Defendit igitur Chrysippum, qui omnem enuntiationem aut veram aut falsam esse indicaverat, tamen addit inde non sequi fatum; neque enim vera esse ex aeternis apta et nexa causis, quae fati necessitatem habeant.

His absolutis illustratur Chrysippi de fato sententia, qui quidem cum inter eos, quibus omnia fato fieri placebat et eos, quibus sine ullo fato videbantur esse animorum motus voluntarii, mediam sequi viam vellet, in fato vim necessitatis non ponebat, sed aliquid in hominum potestate relinquebat atque ut et necessitatem effugeret et retineret fatum, causarum genera distinguens causas esse alias perfectas et principales, alias adiuvantes et proximas dicebat. Ac primum quidem quomodo necessitas fati intellegenda et quatenus confirmanda sit in adsensionibus vel approbationibus (τῶν καταθέσεων; cf. Acad. pr. 12, 37), §§ 40—45 accuratius explicatur, ita ut Chrysippi argumentatio ipsius saepius verbis enarretur. Longum est exponere, quid de Stoicorum, Chrysippi potissimum, doctrina Cicero dicendum putaverit neque ad quaestionem nobis propositam pertinet. Ciceronis paene ad verbum auctoris expressae de hac re argumentationis magnam vel maximam partem e fonte graeco fluxisse nemo iam negabit, qui semel oculo veloci hanc ipsam explicationem uno tenore perlustraverit.

Jam rem ad finem perducamus. Cicero postquam ostendit Chrysippi fatum e praecurrentibus, non necessariis causis neccentis voluntatisque libertatem retinentis sententiam et eorum, qui quanquam visa anteire concedebant, tamen fato fieri adsensiones negabant, cum proxima illa et continens causa eas non moveret, ad eundem venire exitum, § 46 de Epicuri atomis non recte in praecipue cadentibus verba addit. Inter § 45 et § 46 lacuna exstat, quae e primis § 46 verbis ita fere expleri potest, ut dicatur, Ciceronem controversia illa disceptata rationem subiunxisse, qua eiusmodi causa disceptari et ratiocinatio philosophorum posset examinari. Qua quidem ratione illustrata § 46 usque ad finem nostri de fato libelli exponitur non ab atomis Epicuri errantibus deque via declinantibus praesidium esse petendum. Rursus Epicuri mentio fit, quem Cicero hic aeque ac prioribus duobus iam locis fatum sine necessitate potius sequi debuisset quam commenticios adferre atomorum motus dicit; nam ita defendi posse quandam animi motum voluntarium, si in fato necessitas nulla sit.

Atque huius explicationis quantum aliunde sumpserit, quantum Ciceronitribuendum sit, hodie vix intellegitur. Quanquam e verbis § 47: „nec in ipsa atomo mutationis aliquid factum est“, quibus quidem ex obliqua in rectam transitur orationem, nescio an quisquam recte opinetur hoc loco aliquid Ciceronem e sua ipsius sententia addidisse. Haec hactenus.

Jam reliquum est, ut paucis denique verbis de fragmentis agam, quae propitia quadam fortuna e magno nobis quasi naufragio emeruerunt.

Ac primo quidem, quod invenitur apud Gellium noct. attic. VII, 2, 15, Chrysippus in quaestione obscurissima laborans memoratur, quomodo explicet et fato fieri omnia et esse aliquid in nobis. Haec verba in ea, quae hodie exstat inter §§ 45 et 46, lacuna videntur fuisse, ubi de Chrysippi controversia de fato adsensionibus adhibito disseruisse Ciceronem probabile est.

Tum Servii ad Vergil. Aen. III, 376 de Tulliana fati definitione¹⁾ verba e Cicerone excerpta, deinde ab Augustino (de civit. dei 5, 8) versus Homericis commemorantur, quos Cicero in latinum tradidit vertisse sermonem, quibus quidem ille addit, quid fatum esse Stoici senserint, apertissime declarari.

Locum proximum (Augustin. de civit. dei 5, 2) iam supra (cf. pag. 4) ostendisse mihi videor in lacunam inter §§ 4 et 5 inserendum esse. Reliquum est, ut de Macrobiani (Saturn. III, 16, 3) verbis „e dialogo de fato Ciceronis“ excerptis pauca dicam. Adfertur enim narratiuncula

¹⁾ Fatum, quod appellatur connexio rerum per aeternitatem se invicem tenens (cf. Cic. de div. I, 55, 125) apud Senecam (quaest. nat. 2, 36) intellegitur necessitas rerum omnium actionumque, quam nulla vis rumpat.

quaedam de Scipione, cui accipenser piscis magno in honore erat. Nihil sane refert quaerere, ubi exstiterit illa apud Ciceronem; ad rem certe nihil pertinet, tamen de fonte nescio an operae pretium sit conicere, e quo hanc vel alias eiusmodi generis narrationes Cicero videatur hausisse. Quanquam concedimus e suae scientiae copia facile eum addere potuisse, quae ad causam illustrandam addenda putaret, tamen melius rem intellegi posse confido, si huiusmodi exempla, quae ab omnium notitia longius disiuncta erant, Ciceronem aliunde sumpsisse statuimus. Caelius Antipater enim, certus romanae historiae auctor¹⁾, secundum bellum Punicum diligentissime persecutus erat, quo ex scripto Brutum excerpisse constat. Atque Caelii scriptum eo quidem tempore, quo libris philosophis componendis occupatus erat, Ciceroni praesto fuisse, ex epistula mense Junio a. 709 ad Atticum data (ad Attic. XIII, 8) elucet: „epitomen Bruti Caelianum velim mihi mittas“. Fortasse igitur hoc loco Caelianum aliquid ex epitome illa Bruti Caelianorum sumptum profertur. Sed satis de hoc.

Quibus absolutis iam restat, ut repetamus, quid adhuc quaerendo simus adsecuti. Cicero in libello de fato conscripto non omnia fato fieri defendens argumenta Stoicorum e contagione naturae (§§ 5—11), e divinatione (§§ 11—20), e motu sine causa nullo (§§ 20—38) refutat, deinde Chrysippum ait inter duas veterum philosophorum sententias medium ferire voluisse, tamen ad eos potius se applicasse, qui necessitate motus animorum liberos esse arbitrati sunt (§§ 39—45), denique ab atomis Epicuri de via declinantibus ad hanc causam disceptandam praesidium non esse petendum explicat (§§ 46—48). Quaerentibus autem nobis, unde hauriens Cicero hanc de fato commentationem videatur composuisse, id a principio erat statuendum non e variis illorum, quos nominat, scriptorum libris, quae dicenda existimaret, eum collegisse, sed omnes unius tantum scripto adhibito illic nominatos eorumque sententias allatas invenisse. Atque hoc ipsum Posidonii περὶ εἰμαρμένης fuisse singulas libelli partes perlustrantibus satis nobis est probatum. Utique primas disputationis paragraphos (5—6) scribens Posidonii scriptum ante oculos habuisse et ex hoc ipso exempla Cicero sumpsisse videtur. Quatenus ad verba se magistri adiunxerit, hodie non potest disceptari, quoniam Posidonii auctoris libri reliquiae non iam supersunt; tamen cum videmus Ciceronem ex exemplorum, quae adfert, numero nonnulla plane absurda esse censere, hoc a principio concedamus oportet in excerpendo auctore liberior eum versatum esse et in recensendis Posidonii argumentis suo saepius iudicio uti. Sed Posidonius, contra quem primo disputatur, omnibus paene sequentis commentationis partibus Ciceronis auctor habendus est. Atque Chrysippi argumentationem e contagione naturae petitam, quae primo refutatur, in Posidonii libro iam exstitisse et inde a Cicerone excerptam esse nemo neget, quanquam addendum est saepius e romana potissimum historia vitaeque exempla Ciceroni ipsi tribuenda adferri, quibus quidem oratio fiat speciosior. Porro quae de certamine illo περὶ θανάτων inter Chrysippum et Diodorum apud Ciceronem exstant, in his licet ponere vel maximam eum partem e Posidonio pendere. Nimirum in adiungendis exemplis, quae e romana historia repetita romano homini ad tempus praesto debebant esse, quin Cicero in suo stet dubitari non potest. Tum Epicuri et Carneadis contra Chrysippum argumenta in Stoico, quem usque secutus est, auctore Cicero ipsa quoque videtur invenisse; quare in hac disputationis parte exceptis fortasse §§ 24 et 25 in Posidonii libro niti creditur. Quae sequuntur paragraphi (27 et 28), exemplis eae scriptorem romanum produnt, utique liberior in his perorasse et sibi praecipue Cicero confusus videtur esse. Deinde disserit de ignava ratione, qua admissa omnem e vita tolli actionem liberam docet (§§ 29—38), cui quidem περὶ λόγου Chrysippi potissimum et Carneadis rationibus adhibitis ita respondetur, ut arte hoc loco

¹⁾ Val. Max. I, 7, 6.

auctorem graecum Ciceronem secutum esse et saepius ad verbum illius argumentationem expressisse possit poni; tamen variis indicis probatur ea, quae §§ 33—35 comprehenduntur, verba plena Ciceroni ipsi esse adsignanda. Denique in ea, quae iam superest, Tullianae disputationis parte Posidonii librum rursus tanquam fontem subesse accuratius supra exposui.

Haec habui, quae de Ciceronis de fato libelli fontibus dicerem. Atque ut paucis complectar, quod hac disquisitione profecisse mihi videor, Posidonium eum esse conatus sum explicare, quem Cicero adhibuisse videatur nonnullaque ab ipso Cicerone addita esse.

Ac Posidonius quidem sine dubio scriptum reliquit, quo de fato actum erat; tamen incertum est, cuiusnam hoc tituli fuerit. Etenim quanquam a Diog. Laert. VII, 149 commemoratur secundus *περί εἰμαρμένης* liber, nihilo minus vel in iis, quos scripserat *περί θεῶν, περί μαντείας*; aliisque libris, de hac re disputare potuit. Sed ponamus illud *περί εἰμαρμένης* scriptum Ciceroni praesto fuisse: quid de fato senserit, quatenus a Chrysippo abalienaverit, incertum est. Tamen si Ciceroni fides tribuenda est, Posidonium conclusiones fallaces a Chrysippo adhibitas vitasse credamus oportet (cf. § 7). Utique Posidonius Academicorum contra fatum argumentis respectis cum asperitatem antiquiorum Stoicorum improbaret, maiore cautione, quae senserit, professus videtur esse. Atque ab ipso Chrysippo multis eum partibus dissensisse et Platonem potius quam priores secutum esse, optime apparet e verbis Galeni, histor. philos. V, 1, 429: *ὁ δὲ Ποσειδώνιος ἀμφοτέρους* (sc. *Χρυσίππῳ καὶ Ζήνωνι*) *διενεχθεὶς ἐπαναί τε ἅμα καὶ προσέειπε τὸ Πλάτωνος δόγμα καὶ ἀντιτίθει τοῖς περὶ τὸν Νόστιππον οὕτως χρίσεις εἶναι τὰ πάθη δεινύων οὕτως . . .* (cf. Zeller, hist. philos. III¹ p. 580). Singularem insuper Posidonio de fato sententiam fuisse Plutarchus in libro de placitis philosophorum I, 28 *περὶ οὐσίας εἰμαρμένης* his verbis explicat: *οἱ [ἄλλοι] Στωικὸν εἰρμόν αἰτιῶν, τοιαῦτα τὰς καὶ . . . Ποσειδώνιος τριῖν ἀπὸ Διὸς πρῶτον μὲν γὰρ εἶναι τὸν Δία, δεύτερον τὴν φύσιν, τρίτον δὲ τὴν εἰμαρμένην* (cf. Cic. de div. I, 55, 125). Inde nobis conicere licet vel hoc ipso *περὶ εἰμαρμένης* libro a prioribus eum degenerasse. Sine dubio in eo aliorum philosophorum sententias illustratas Cicero invenit, quas ille quidem ex ipsorum scriptis excoepserat, excerptas collegerat, nempe Chrysippi, Stilponis, Diodori, Epicuri, Carneadis.

Posidonii igitur scriptum Ciceroni de fato disserenti praesto fuisse hac commentatione probavisse mihi videor. Itaque omnes libelli partes, quibus e Diodori vel Carneadis mente contra Chrysippi sententiam disputatur (§§ 7—26, 29—32, 36—48) Posidonio esse tribuendas iudico. Exempla e romana historia repetita et reliquae commentationis partes adiuncta illa nimirum paragrapho, qua electi ex Ennii Medea versus adferuntur (§ 35), a Cicerone ex ipsius arbitrio elaboratae sunt. Atque ut in universum de ratione iudicemus, qua Cicero in adhibendo graeco auctore versatus sit, sane concedamus oportet multa eum e sua scientia cognitionisque copia exprompsisse et e fonte suo ipsius iudicio arbitrioque tantum modo hausisse, quantum alicuius ad rem momenti videbatur, omnibus autem partibus vel in exponenda sua sententia vel in recensendis philosophorum placitis maxima, qua potuit, cum diligentia versatum esse.